



Press Release No. 13/66
FOR IMMEDIATE RELEASE
Machi 6, 2013

International Monetary Fund
Washington, D.C. 20431 USA

**Ujumbe wa Shirika la Fedha la Kimataifa (IMF) wahitimisha ziara yake Nchini
Tanzania**

Ujumbe wa Shirika la Fedha la Kimataifa (IMF) ukiongozwa na Bw. Paolo Mauro, ulitembelea Dar es Salaam, Tanzania kuanzia tarehe 21 Februari hadi tarehe 6 Machi 2013 ili kufanya majadiliano ya tathmini ya sita na ya mwisho chini ya Mpango wa Ushauri wa Sera za Uchumi (Policy Support Instrument - PSI) ambao utafikia ukomo mwezi Juni 2013 na tathmini ya pili chini ya Mkopo Nafuu wa Dharura (Standby Credit Facility - SCF) ambao utafikia ukomo mwezi Januari 2013. Ujumbe wa IMF ulikutana na Waziri wa Fedha Mhe. Dkt. William A. Mgimwa, Gavana wa Benki Kuu ya Tanzania Prof. Benno Ndulu, maafisa waandamizi wa Serikali, wawakilishi wa sekta binafsi, na washirika wa maendeleo.

Wakati wa kuhitimisha ziara, Bw. Mauro alitoa taarifa ifuatayo:

“Uchumi wa Tanzania umeendelea kuimarika. Pato la Taifa kwa mwaka 2013 linakadiriwa kukua kwa asilimia 7. Mfumuko wa bei umeendelea kupungua japo kwa taratibu kuliko ilivyotarajiwa, hata hivyo tunategemea kuwa utafikia kiwango cha tarakimu moja katikati ya mwaka 2013.

“Utekelezaji wa programu ya PSI/SCF kwa ujumla ulikuwa wa kuridhisha. Malengo yote ya kitarakimu ya mwisho wa mwezi Desemba 2012 yamefikwa isipokuwa utekelezaji wa malengo ya marekebisha ya kimuundo umekuwa wa kutofautiana. Kutokana na kuongezeka kwa shinikizo katika urari wa malipo ya nje, mwishoni mwa Januari 2013 serikali iliamua kuchukua sehemu ya mkopo nafuu wa dharura kutoka IMF (SCF) inayofikia takribani dola za kimarekani milioni 114 ili kusaia juhudi nyingine za kisera za kuimarisha na kuongeza imani katika soko la fedha za kigeni. Ujumbe umefurahishwa na ahadiya serikali ya kuwa na nakisi ya bajeti isiyoziidi asilimia 5.5 ya Pato la Taifa kwa mwaka 2012/13 licha ya upungufu kidogo katika ukusanyaji wa mapato ya ndani na athari kwenye bajeti kutokanayo na gharama kubwa za kuzalisha umeme, kufuatia hali mbaya ya mvua.

Serikali na Ujumbe wa Shirika la Fedha la Kimataifa wamepiga hatua muhimu katika majadiliano yao. Sera za kiuchumi zitaendelea kulenga kuthibiti mfumuko wa bei, kuwa na deni ambalo ni himilivu, na kuongeza akiba ya fedha za kigeni ambako kutawezeshwa na

kuendelea kuimarishwa kwa nguvu za soko katika kuweka thamani ya shilingi.. Ujumbe umefurahishwa na utayari wa serikali katika kuchukua hatua za kupunguza ujazi wa fedha ili kuweza kufikia lengo lake la kuwa na mfumuko wa bei wa asilimia 7 ifikapo mwishoni mwa mwaka 2013. Ujumbe umekubaliana na lengo la serikali la kupunguza zaidi nakisi ya bajeti kwa mwaka 2013/14, pamoja na malengo yenye ari na lakini yanayowezekana, ya kuongeza mapato ya serikali kwa kiwango kikubwa, uwazi katika kuiwezesha sekta ya nishati, na kudhibiti kongezeko la malimbikizo ya madai (yakiwemo ya ujenzi wa miundombinu ya barabara) yaliyoanza kujitokeza mwaka huu wa fedha. Uhakiki wa haraka wa madai yote ni hatua ya kwanza katika kufikia lengo.

Bodi Tendaji ya Shirika la Fedha la Kimataifa (IMF Executive Board) inatarajia kujadili tathmini ya mapitio ya PSI na SCF mwishoni mwa mwezi Mei 2013. Ujumbe wa IMF unatoa shukrani za dhati kwa serikali kwa ukarimu wake na kwa majadiliano ya uwazi na yenye tija kwenye masuala ya kisera.